



Osumnjičen za zločine u Zecovimà **Zdravko Antić uhapšen nakon deset dana bijega**

Spominje se i kao učesnik u ratnim zločinima u selima Rajlaš, Briševo, Stara Rijeka

U nastavku aktivnosti u predmetu za ratne zločine počinjene nad bošnjačkim stanovništvom u mjestu Zecovi kod Prijedora jučer je lišen slobode osumnjičeni Zdravko Antić zvani Liko, star 57 godina.

Prethodno su službenici Tužilaštva BiH i SIPA-e za ratni zločin u Zecovima uhapsili 12 osumnjičenih. Antić je, kako saznaje „Avaz“, bio u bijegu od 17. novembra, ali koordiniranim radom na terenu, lociran je i lišen slobode. Jučer, prije 17 sati, predat je postupajućem tužiocu u Tužilaštvu BiH.

Postoje dokazi da je Zdravko Antić bio dio „ekipe“ iz Rasavaca koju je u zločine vodio Duško Milunić, zvani

Bizon, komandant Teritorijalne odbrane ovog naselja nadomak Prijedora. Antić se s bratom Slavkom spominje i kao učesnik u ratnim zločinima u selima Rajlaš, Briševo, Stara Rijeka i drugim naseljima u Gornjoj i Donjoj Ljubiji, te muslimanskim selima na Brdu, općina Prijedor.

Tužilaštvo BiH provodi istragu o ratnom zločinu nad bošnjačkim stanovništvom u mjestu Zecovi kod Prijedora 1992. godine, kada je ubijeno više od 150 žrtava, od kojih je dio žrtava pronađen i identificiran u masovnoj grobnici Tomašica, a ubijeno je i 29 žena i djece, za čijim tijelima se još traga. **M. D.**